

CANTIC

AR BUGUEL PRODIG.

281

7

*Pehini a zo meurbet profitapl da zisqüez d'an
dud yaouanq da zioüal diouz ar güin ha
diouz ar merc'het.*

Var ton ar Falz Pinvidic.

ENTENTIT oll Bretonet, hac e cléfot cana,
Buez ar Buguel Prodig, mar gallân disclêria :
Plijadur ho pezo sur, mar qirit ententi
Ha profitapl eo ive ouz tad ha mam senti.

Cetu amàn en antier buez ar Mab Prodig,
A voa en e liberte abaoe yaouanqic ;
E dad, e vam en Ieze da c'hoari ha tripal :
Diouz goal gompagnunezou e tle pep den dioüal.

Calz a dud zo er bed-màn ha ne sourciant qet
Pe a lec'h e teu madou, pa n'o gonezont qet,
Evit o drouc implija ne reont cäs a ze :
Nep'o deus-e gounezet o deus bet poan gante.

Tad ha mam me ho suppli, ha mestr ha mestrezet,
Corrijit an dud yaouanq, ha dalc'hit-e sujet ;
Difennit oute ar güin, ar c'hartou, an dansou :
Cassit-e d'an Oferen ha d'ar C'hatekismou.

Glêvit oll, tud pinvidic, pa oc'h eus ar voyen,
Corrijit ho pugale hac ho servicherrien ;
Na roit qet liberte en yaouanqis dê re :
Disqit deze oll abret da zervicha Doue.

Grit deze monet bemde da glêvet oferén,
A bella diouz an den pep seurt goal blanedén,
Enni ez eus eun tenzor hac a zo caer meurbet,
Represanti Passion hor Zalver beniguët.

Emàn voa eun den yaouanq ha na rê câs ebet
Pe a lec'h e teu madou, pa n'o goneze qet :
Qer prompt evel ar grizill pe ar gliz e mis mae
Vize an arc'hant gantân, cher vad, c'hoari a rê.

Ur spaç a amzer e voe e ty e dad maguet,
Madou bras a zispigne, ha na rê câs ebet,
Gant ar c'hartou, an dançou, ar güin hac ar merc'het
O tispign en un devez tostic da zaou c'hant scoet.

Ne voa nemet pemzec via pa c'houlennas qenta
E bartach diouz e dad, ma carje e rêi dezâ ;
Mes e dad a estime, pa vije deut en oad,
E teje dezân sqiant pelloc'h da evessât.

E dad hac e vam bemde a bede evita
Jesus hac e Vam Mari da rêi ar c'hraç dezâ

Da veza un den honest, evel ma oant-y bet;
Evit qement m'er pedent, oute ne zente qet.

Un devez e lavaras sur d'e vam ha d'e dad,
Me renq hirio caout arc'hant evit ober cher vat;
Me a zo un den yaouanq eus a gondition,
Hac a renq ober cher vad gant an dud a fêçon.

Pa voa pemp bloas varnugent, e lavaras d'e dad :
Me a ranq caout va fartach bremâ en ur yalc'hat;
Me a yêlo da vale evit gaelet ar vrô,
Ha ma cavân va fortun eun tu, m'e c'hemero.

E dad a respont dezâ gant carante bepret :
Me ro va bennos deoc'h gant carante barfet;
Ho pezit sônj a Jesus, ne ancounait qet
Ar c'homzou en deus ho tad alies lavaret.

Neuze e roas e dad dezân trêgout mil scoet
En aour fin hac en arc'hant en ur yalc'hat contet ;
Cetu aze ho partach, pa fell dêc'h hor c'huitât :
Doue roi deoc'h e c'hraç d'ober ur veach vat.

Qenta repas a eure ar Prodig obstinet
Voa en un hostaliri gant ur vanden merc'het,
Servichet mad voe certain en deiz-se da goania,
Sonerien evit dansal, plac'h coant da servicha.

Pa vise'r gompagnunez ous an daol azeet,
E voa en e blijadur ha gantân ar merc'het;
Qeit ha ma pade arc'hant, cher vat a rent gantân,
Plijadur bras a gavent ober goab anezân.

P'oa dispignet e arc'hant, e vije trist meurbet,
E lar d'e gompagnunez n'en deus liard ebet ;
Mes ractal e hostises dezàn e deus respontet :
M'o tivisco, compagnun, ma na ven-me pèet.

Pa voa goastet e arc'hant, ne voa netra chomet,
E falle dezàn c'hoari, ober cher vat bepret ;
Mes a dauliou geuneuden e voe prest qempennet,
Tennet e vleo ouz e benn ha qerqent divisqet.

Goude ma voe chassset eus an hostaliri,
N'en devoa qet a zillad, nac a voed da zèbri ;
Un drue voa e glèvet o crial en henchou,
Gant riou ha naon en devoa goude e oll cheriou.

Neuze o tistroas c'hoas d'ar guêr da dy e dad,
Evit goulen da loja evel eun tremeniat :
En han' Doue, emezàn, m'ho ped hac ho suppli
Da loja eun tremeniat zo scuis ha na ell mui.

Pa voa lojet gant e dad, n'en anavee qet,
En a ouye an doare, mes n'en disqêeze qet,
Pa voant êt oll da gousqet, én a gassas gantâ
Vesselion aour hac arc'hant demeus ar re gaera.

Neuze en em gavas prest gant he hostaliri,
Hac en devoe evite da eva, d'a dibri ;
Qeit ha ma padjont outàn bepret e rê cher vat,
Mes ne badas qet pell bras ar vech-se ar yalc'hat.

Neuze e voe tracasset, injuriet gante,
Evel eur forban basnet voa da velet neuze ;

Hac o tonet da zònjal e voa ur pec'her bras,
Pa voe bolonte Doue en em gouvertissas.

Pa zònjias en e vuez, e sellas ous an eê,
O sellet pebes fortun bepret a rancontre;
Monet a eure neuze, goude e voal vue,
Da evessa al loened o tistrêi ous Doue.

Monet a eure neuze d'un ty da servicha,
Ma vije o bolontez da rêi souten deza.
Me chomo da labourat en arat, mar qeret,
Pe autramant me a yêl da viret al loenet.

Neuze e laras dezàn ar merer ac'hane :
N'anduràn qet an dud scàn a ve bet o vale;
Me meus tud da labourat qement hac a so ret,
Nemet da viret ar moc'h mar qeret e chomet.

En han' Doue, emezàn, va mestr, me ho suppli,
Me rai vel ma lavaret : va mirit en ho ty;
Mar gallàn ho servicha evel ma leveret,
Qeit ha ma plijo ganêc'h evit caout un tam boed.

Neuze e zeas ar Prodic da vessa ar moc'h-se,
O tont da gonsideri güechal en e vue,
En devoa grêt cheriou mat, ha drouc distribuet,
Ha bremâ en paourte n'en devoa esqen boed.

Un druez voa e glêvet en noas beo o crial,
Gant paourte ha fatic goude e reus fall;
Gant naon e voe surprenet qen a rancas dibri
En ul laouer gant ar moc'h a bep seurt vileni.

Güell ve da un den certen beza nao de var yun
Eguet ober re gorfat, na beza disasun.
Coll a ra e zantimant neuze gant re gorfat,
Ha m'ar caret e lezel, o rai eun drouc benac.

Beza escus debochet ha drouc implij madou,
Ar merc'het fall hac ar güin zo caus da valeuriou,
Ha goude ar foll dispigo e zeont d'en em gana ;
Cetu siouas maleuriou goude drouc implija.

Peguen lies a zen sur a zo var ar bed-màn,
A zo bet pinvidic bras, allas ! zo paour bremàn !
Goude prodigalite, eva güin ha c'hoari,
E vezo trist ar Prodig, ma na ve da zibri.

Goude e foll dispignou, cetu en distroet
Da veza den gracios, humbl meurbet ha parfet ;
Pa voa bolonte Doue en em gonvertissas,
Hac e teuas ar vech-se d'ar guer morc'hedus bras.

Goude-se en em rentas e qichennic e dad,
Hac e teuas da sonjal gant ur volonte vat :
Autrou-Doue, emezàn, ha m'em be hardisson.
Da vonet dirac va zad, ha me qen dirêson.

Me a ya en han' Doue, emezàn, da antren :
Deiz mat déc'h, c'houi a bedàn, cetu ho courc'hemen,
Cetu ho mab hirvoudus : lavaret mad ho poa
E vizen e paourentez, ma ne gajen poania.

Va mab, me a zo joaüs d'ho peza distroet,
Meulet bremàn a galon a Verc'hez beniguet ;

Me am boa digant Doue pell a zo deziret,
Evit clêvet ho toare, pelec'h e vijec'h êt.

Me so ar maleürussa a voe biscoas er bed :
En hano Jesus ha Mari, va zad, va fardonet :
Me meus goall distribueta ar pezh ho poa roet
Din da ober va frofit, ma carien o miret.

E dad a laras neuze d'e oll servicherrien :
Ret eo laza eun oan læz, un oc'h hac un eujen ;
Da ober ur banquet caer d'am mab zo distroet ;
Ret eo dont, va zud qeaz, varc'hoas d'e velet.

Calz a dud zo er bed-mâ evel ar Mab Prodig,
Hac a zo anval ive ouz ar Falz Pinvidic ;
Er bed-mân eo e qevont amâ o baradoes,
N'o devez sônj a Jesus nac e Vam ar Verc'hez.

Me ho suppli, tud yaouanq a bep sort qalite,
Tud a bep condition, hac ar ré gôz ive,
Diouz goall gompagnunez da zioual bepret
Ar c'hoari, an nôzveziou, ar güin hac ar merc'het.

Ar re-ze siousas, a zo da galz occasion
Da ober calz maleuriou hac o daonation :
Caledet int nôz ha deiz ebars en o fec'het,
Fê eo gant calz o c'helen en hent da veza salvet.

Ma caremp consideri en Mari-Madalen,
Zo en em gonvertisset gant ur sermon hepquen,
Ni ne reomp cäs, siousas, evit clêvet bemde
Sermoniou, buez ar Sent, hac exemplou ive.

Allas! nac a oferen bret, na sermoniou ive,
Ne gar qet tud obstinet n'o deus doujaoc Doue,
Na Catekismou da Sul, ive d'ar Goueliou din,
Cetu, siouas, an henchou a gundu d'ar goal fin.

Diou gonsideration a rencomp da gavet
Evit miret ouz an den ne ve qet condaonet :
Ar c'henta caret Doue dreist madou ar bed man;
D'an eil, aon rac an ifern, a zo carguet a boan.

En han' Doue, Christenien, greomp oll orêson
D'ar Verc'hez sacr, Mam Jesus, bemdez a vir galon
D'hon Æl-mat ha Gardien, d'ar Zent ha d'hor Paëron
Zo hon hüir Advocadet dirac Roue an Trôn.

Clêvet oc'h eus an histoar, ha mar qeret miret
Dious prodigalite dont da dioüal bepret;
Goulennomp digant Jesus hac ar Verc'hez divin
Ar c'hraç da vont d'e veuli er Barados er fin.

FIN.

E Montroulez, e ty LÉDAN, rue ar Pave.